

Neskengan kirol azturak sustatzeko bideak aztertuko dira gaur Donostian

Jardunaldiak Kirolkunde kanpainaren barruan kokatuko dira

Kirol, osasun eta psikologia arloko adituek hartuko dute parte gaur Donostian egingo diren Gorputz Hezkidetzari buruzko Jardunaldi Teknikoetan. Kirolkunde kanpainaren barruan kokatzen den ekimenak neska gazteengan kirola egiteko ohitura sortu eta errotzea du helburu.

JOSE MARI PASTOR / DONOSTIA

Gaurko jardunaldiak Emakundek azaroaren 4ean Gasteizen aurkeztu zuen Kirolkunde kanpainaren helburuei lotuta daude. «Emakumezkoaren eta kirolaren artean maiz izaten den urruntasuna» gainditzeko. Ekimen honek 14-20 urte bitarteko emakumezkoen artean kirola bultzatzea du xede eta Euskal Autonomi Elkarteak ikastetxe, kiroldegia eta kirol elkarteetan burutzen ari da.

«Eskola mailan kirola egiten duten 100 lagunetatik 40 emakumezkoak dira baina portzentaia hau % 17ra jaisten da 14 urtetik aurrera, OHOk zikloa amaitzen dutenean», esan zuen Jose Antonio Santano Gipuzkoako kirol diputatuak jardunaldi hauek aurkezteko atzo egin zen prentsurrekoan.

Juanjo Ziarrusta Bizkaiko Al-
dundiko kirol zuzendariak baieztatu egin zituen datu hauek esparru honetan ere emakumezkoak oraindik «diskriminatuta» dagoela gaineratzeko. Ziarrustak azaldu zuenez, Bizkaian 50.000 kartel eta 1.000 bideo banatu dira kanpainaren barruan.



Jardunaldien aurkezpena atzo Donostian.

GILLENEA

Txaro Arteaga Emakundeko zuzendariak ekimenaren helburu nagusiak aztertu zituen. Arteagaren arabera, Gorputz Hezkidetzari buruzko Jardunaldi Teknikoak Kirolkunde kanpainaren barruan kokatzen dira. Kanpaina honek 'Etzazu utzi' lema du eta kirolak ekartzen dituen alde onak nabarmendu egiten ditu. Aspektu hauek telebistan iragarki gisa eta eskoletan material informatibo modura egunotan ematen ari den bideo batean agertzen dira arlo desberdinetatik azalduta.

«DAMU IZANGO ZARA» Bideoan hainbat aditu eta emakumezko kirolariak hitz egiten dute. «Uzten baduzu, damu izango zara», «ez da soil-soilik estetika kontua, osasun kontua baizik» eta «kirolak gure posibilitateak eta mugak agertarazteaz gain, lagundu egiten digu bestee-

kiko harremanetan», dira, besteak beste, emanaldian azaltzen diren mezu nagusiak.

Emakumezkoa eta kirola uztartzeko kanpaina neskatoengana ezezik guraso eta hezitzaileen-gana ere bideratzeko komenentziaz mintzatu zen Txaro Arteaga, beraiek adin horretako gazteengan izaten duten eraginaz jabeturik.

Emakundeko buruak gaur izango diren jardunaldien garrantzia nabarmendu zuen, bertan neskaxengan kirol ohiturak sortu eta errota beharra aztertuko baitute hainbat arlotako profesionalak.

Jardunaldiak Emakundek, EAÉko hiru herrialdeetako Diputazioek eta Bilbo eta Gasteizko Udalek sostengatu dituzte Euskadi Kutzaren laguntzaz eta aurrezki elkarte honen kultur aretoan izango dira.

Eusko Legebiltzararen aurrean protesta egingo du gaur AEK-k

BILBO

Alfabetatze Euskalduntze Koordinakundeak kontzentrazio bat egingo du gaur eguerdian Eusko Legebiltzararen egoitzaren aurrean, datorren urteko aurrekontuen eztabaia gaur hasiko baita.

«Aurten, Eusko Jaur-laritzak dirulaguntzak kendu dizkie Euskal Autonomi Elkarteko euskaltegi libreei, urte osoan zehar 17.000 ikasle inguru dirulaguntzarik gabe utziz eta AEKren egoera ekonomikoa are gehiago okertuz», jakinarazi zuten atzo AEK-ko ordezkariak.

Iturri berberen arabera, erabaki hori azken urteotan euskararen kontra egindako «erasorik latzenetako» bat izan da. Hala ere, «beste eraso larriago baten atarian egon gitezke», gehitu zuten, «euskaltegi libreak ez baitira agertzen 1994. urteko aurrekontuetan».

«Kultura Sails, euskaltegi libreen kontrako erabakia krisiak eragindako ezohizko neurria bailitzen aurkeztzen saiatu da, aurrerantzean segidarik izango ez lukeena. Beraz, oso kezagarria deritzogu datorren urteko aurrekontue-

tan euskaltegi libreen aipamenik ez agertzeari, honek erakutsiko bailiguke, aitzakiak gora-behera, euskararen aldeko herri ekimena itotzeko ahalegin nabaria dagoela batzuen aldetik», gaitzetsi zuten.


AZOKA DONIBANE LOHIZUNEN Donibaneko ikasleak AEK elkarteak la-

runbat honetarako euskarazko liburu, disko eta prentsaren azoka antolatu du goizeko bederatzietarik arratsaldeko zazpiak arte, Donibane-Lohizuneko portuan den Erretegian.

Antolatzaileek diotenez, «aukera bikaina da elkarren lana ezagutarazteko Iparraldeko biztanleei, horren eskasia nabarmen sentitzen baita». Iparraldeko euskarazko argitalpenak aurkitzen ahalko dira horrela, 'Maiatz', 'Hatsa', EGUNKARIA, 'Herria', besteak beste.

Elkarte edo erakundeei mahaiak eskainiko zaizkie beren ekoizpenen agertzeko, hiri erdian egokitua den aterbe egokian. Arratsean, erromeria izango da kantaldi baten aurretik. Orduan Irigoien Anaiak eta Keñu taldeak eguna bukatuko dute.

LUZIEK ETXEHARRETA



Gure mendien historiaurrea

Jacques Blot arkeologoak Euskal Herriko mendien historiaurreaz egin liburuaren hiru hizkuntzetako edizioa aurkeztu zuten atzo Baionan Zabal liburutegian. Elkar-ek argitaratu du liburua. Euskaldunek sei mila urte mendietan utzi azarnak ikertu ditu, harrespila edo trikuharrietan. Argazki apain ederrekin Xoldokogainetik Orhiren oinetara bidai miragarri batera gomitzen gaitu. Euskal ondare aberatsaren zainketa dei bat egin du liburuarekin.

Urepeleko amuarrainen pozoidura kloro isurketak eragin zuen

L. ETXEHARRETA / BAIONA

Urepeleko (Nafarroa Beherea) Arraina amuarrain haztegia as-
telehen ilunabarrean 17.30etan gertatu istripuak kalte handiak eragin zituen, milioi bat arrain hilaraziz. Gorago zen iturri batean egin kloro isurketa batek eragin zuela frogatu du inkestak.

Aldudeko jandarmek ziurtatu dutenez «gaur ez da kutsadura arriskurik». Kloroaren diluzioa egin ondoren arraintentzako arriskuak ezabatuak dira. Hala ere, kalteak arraintegian gertatu baziren gehienbat, bertako urak Errobira joatearekin, amuarrain askoren hilketak eragin zuen as-
telehen arratsean, Alduderaino, Baigorriko bidean.

Urpelen iturriko uraren era-

bitpen komertzialaren xedea izan daiteke istripua eragin duena. Aspaldiko 'Urepeleko uraren' biltzeko xedea, 'Iturri Handian' aipatzen da. Etxe eraikuntzan ingeniari den batek joan zen as-
telehenean iturriko ura bere bakteriez garbitu nahian bost kilo kloro pastila uretara erortzen utzi zituen.

Ez da argi oraindik zergatik hain emeki urtzen ari ziren pastilak ikustearekin zergatik ez zuen inongo deia darrik egin. Horrela, minutu gutxitan 200 metrora zen arraintegira ur kloratua iritsi zen, berehala bertan zen milioi bat arrain hilaraziz.

Arraina arraintegiaren urteko ekoizpena ia hondatu da istripu horrengatik. Alabaina, sei hilabetetan hazkuntza da egiten hor amuarrainentzat, Izpegi edo Lu-

husoko arraintegietara gizentzera joan aurretik. Toki horietara joan behar zuten bezperan da gertatu dena. Enpresak 15 langile dauzka eta argi da 'langabezi tekniko' bat ekarriko duela horrek. Dena den, diru kalte handiak izango ditu arraintegiak.

Arraintegian edo Errobin suhiltzaileek bildu arrain hilak Agenetik etorri enpresa batek bere kamioietan eramaten ibili da hiru egunez. Arraintegien kutsadura maiz aipatzen da Iparraldean. Ingurugiroaz arduratzen diren elkarteek maiz azpimarratu dute arraintegiek sortu kalteak ibai urei. Aldi honetan batek jasan ditu kalte larriak, baina ibai kutsadura ere eraginez. Uraren inguruko ekosistemei oso erraz kalte egin dakiekeela agerian jarri da berriro kasu honetan.